



Sesida dal

1. da matg 2018

Communitgà ils

2 da matg 2018

Protocol nr.

335

Dumonda da la fracziun da la PS

concernent la restricziun dals dretgs fundamentals durant il WEF 2018

Resposta da la regenza

Per la regenza ha il dretg fundamental d'exprimer libramain l'opiniun ina impurtanza centrala. Fin ussa ed er al WEF da quest onn è ella s'engaschada che demonstra-ziuns a Tavau pon vegnir realisadas en il rom dal pussaivel e vegnan permessas. Las dumondas vegnan respundidas sco suonda:

Tar la dumonda 1: La giunta dal WEF da la regenza aveva s'exprimida davart la dumonda da demonstraziun da la PS/giuventetgna socialista en quel senn che la permissiun per la demonstraziun planisada sin la piazza possia – en regard a la situaziun da quellas uras – vegnir concedida ord vista da la polizia da segirezza.

Tar la dumonda 2: La giunta dal WEF da la regenza aveva communitgà sia posiziun ord vista da la polizia da segirezza. La cumpetenzza da giuditgar dumondas da demonstraziun resguardond tut las circumstanzas decisivas è chausa da la vischnanca. Cun in recurs a la dretgira administrativa pon decisiuns da la vischnanca vegnir suttamessas ad in'examinaziun giudiziala. I n'è pia betg chausa da la regenza da giuditgar la decisiun da la vischnanca, essend ch'il chantun aveva prendì posiziun mo davart in aspect parzial. Dal rest avevan las relaziuns localas (quantitad da naiv, pussaivladads da rumir la naiv, traffic e.u.v.) che stuevan vegnir giuditgadas da l'autorità locala, q.v.d. dal cussegl pitschen, giugà ina rolla decisiva en il cas qua avant maun.

Tar la dumonda 3: Il chantun aveva, sco gia menziunà, communitgà a la vischnanca sia posiziun ord vista da la polizia da segirezza. La regenza na po betg commentar il process da giuditgar la situaziun e da decider da la vischnanca.

Tar la dumonda 4: Durant la dieta annuala 2018 dal WEF n'hai dà naginas arrestaziuns. Pliras persunas èn però vegnidas manadas al post da polizia da Tavau per verifitgar l'identidad. Tenor la lescha da polizia dal chantun Grischun sa tracti en quests cas da fermanzas.

Tar la dumonda 5: Las commembras ed ils commembers da la giuventetgna socialista da la Svizra avevan sa participads ad ina demonstraziun betg permessa ed eran s'avischinads a la zona da segirezza. Tenor las ordinaziuns da la polizia ch'èn vegnidas communitgadas publicamain ils 6 da december 2017 era l'entrada en la zona da segirezza reservada a persunas autorisadas. Persunas ch'emprovan d'entrar illegalmain en la zona da segirezza u che sa trategnan en tala senza autorisaziun, vegnan per regla fermadas, per che ulteriuras mesiras polizialas possian vegnir examinadas. Correspondentamain avevan las forzas d'acziun il cumond da manar persunas che emprovan d'entrar illegalmain en la zona da segirezza u che sa trategnan en tala al post da polizia da Tavau. Quest cumond avevan exequì las forzas da segirezza.

Pervia da problems da comunicaziun e pervia da circumstanzas disfortunadas è il schurnalist da la NZZ daventà part da questa fermanza. En la retrospectiva e cun l'enconuschientscha da las circumstanzas concretas avessan ils scleriments ch'èn stads necessaris en quel connex pudì vegnir fatgs en moda pli simpla.



En num da la regenza

Il president:

Dr. Mario Cavigelli

Il chancelier:

Daniel Spadin